



ATASSUT
Steen Lyngø

UPA15/98-1
12.03.2015

Uunga siunnersuut: Siusinaartumik pensionisiat pillugit Inatsisartut inatsisaat nr. xx, xx.xx 2015-imeersoq.

(Ilaqtariinnermut, Naligiissitaanermut Isumaginninnermullu Naalakkersuisoq)

Siusinaartumik pensionisiat pillugit Inatsisartut inatsisissaattut siunnersuut, siusinaartumik pensionisarnermut tunngavinnik allannguilluinnartussa q aammalu siusinaartumik pensionisiallit akornanni sulileqqissinnaasut sulilerseqqinniarneqarnissaannik siunertaqartoq ATASSUT-mit makkuninnga oqaaseqarfigissavarput.

Kalaallit Nunatta Naatsorsueqqissaarfiata kisitsisaatai naapertorlugit Kalaallit Nunatsinni innuttaasut sulisinnaasutut isumalluutit 36.000-it sinnilaarlugit amerlassuseqarput. Ullumikkut killiffitsinni siusinaartumik pensionisiaqartut 3.000-it ataataarlugit amerlassuseqarput, naatsorsuutigineqarporlu taakkunanga 60-it ataallugit ukiullit 2000-it sinneqqavaat.

ATASSUT-mit qularinngilarput siusinaarlutik pensionisiaqartut akornanni tamakkiisumik ilaannakortumilluunniit sulilerseqqinneqarsinnaasut arlaqarsimassasut, taamaattorli siunnersuutip tunngavilersuutaani takusinnaavarput aaqqissuusseqqinnerup naammassineqarnerani naatsorsuutigineqartoq sulilerseqqinneqarsinnaasutut naatsorsuutigineqartut 317-inik amerlassuseqarumaartut.

Iluarsaaqqinnerup aningaasatigut nunatta karsianut 40 mio. kr.-inik sipaarutaasinnaassasoq ilanngullugu naatsorsuutigineqarpoq, tassa 60-it ataallugu ukiulinnut siusinaartumik pensionisiaqartitsisarneq 172 mio. kr.-iniit 132 mio. kr.-inut appartinneqarsinnaassasoq naatsorsuutigineqarluni.

ATASSUT-mit pingaartilluinnagaraarput naalakkersuinnermik suliaqarnermi inuk qitiutillugu sulisoqassasoq, taamaammat kisitsisit aaqqissuusseqqinnermi pineqartut uagutsinnut qitiunngillat,



ATASSUT INATSISARTUNI

qitiuvoq innuttaasut siusinaartumik pensionisiaqartut sulilerseqqinneqarsinnaasutut naatsorsuutigineqartut inuttut ataqqinassusaat aammalu piginnaasaat aallaavigalugit suliniut ingerlanneqassasoq.

Kaammattuineq periarfissiinerlu aammalu minnerunngitsumik sulilerseqqinniakkat ajunngitsumik atugaqartitaallutik suliffissaqartinneqarnissaat sulilersitseqqiiniarnermi qitiutinneqassasut naatsorsuutigilluinnarparput, taamaammat aaqqissuusseqqinnerup ingerlanerani nalilersuisoqartarnissaa ATASSUT-mut pingaaruteqarluinnarpoq.

Taamatuttaaq ATASSUT-mut pingaaruteqarluinnarpoq innuttaasut siusinaartumik pensionisiaqartut ullumikkut inissisimasut aningaasartuutaannartut taamaammallu sipaarniuteqarfissaannartut isigineqalinnginnissaat, taamaammat kissaatigaarput siunnersuutip aappassaaneerneqannginnerani annertussutsinut pingasunut agguarlugit pensionisisitsisalernissamik pilersaaruteqarneq nalilersorluarneqassasoq aammalu qulakkeerneqassasoq periaaseq taanna aqqutigalugu innuttaasut taamatut inissisimasut atugarliornerulersinneqannginnissaat qulakkeerniarneqassasoq.

ATASSUT-mit siullermeerinninnermi sunniutaasussatut tikkuarneqartut ataasiakkaat pulaterfiginiangilavut, isumaqaratta suliaq peqqissaarluinnartumik pilersaarusiugaalluurtumillu ingerlanneqartariaqartoq naalakkersuinikkut aalajangiisoqartinnagu.

Taamaammat siullermeerinninnermi taamatut oqaaseqarluta kaammattuutigissavarput siunnersuutip aappassaaneerneqannginnerani Inatsisartut Ilaqutariinnermut Peqqissutsimullu Ataatsimiititaliaanut sukumiisumik misissorlugulu suliassanngortinneqassasoq inassutigissavarput aammalu kaammattuutigissavarput piffissaq qulaajaaqqissaarnermut pisariaqartinneqartoq tassani atorneqassasoq.